



Gnot. Parsore di me si siere il mâr, cun sabladis di lusints lusôrs di rivoc che a tegnin daûr a scurôrs di abîs fers e, di colp, il terôr crudêl, l'afan, la lote, il dolôr, a son parâts di une altre bande de aghe nere e salmastre che e jentre dentri di me e i miei voi dulints si sierin, un sens di pâs al inonde l'univers e jo mi plati intun piçul spazi scognossût, fintremai che o deventi une cussience pure, cence pês.

Al è in chê volte che o barlumi un debul lusôr. Al è dî!“Cuant che dut ator al è scûr, al reste dome un debul lusôr. Ma par viodilu, bisugne sedi usâts a cirîlu”.O soi Onia. O ai simpri vivût inte mê vile di barachis; la mê e je une famee cun tancj di lôr, la nestre cjase no esist. O vivin in tal curtîl pantanôs de cjase dirocade di une vecje cjochele, mate di leâ che ogni moment e berle di mandânus vie.

Mê mari e je nichilide. No fevele e no si môf in dut al dî. Mê pari no sai mai dulà che al è. I miei fradis a son ducj plui piçui di me.

O ai fan di cuant che o soi nassude; cuasi mai o ai il stomit plen e la mê ocupazion principâl, se no esclusive, e je simpri stade chê di jemplâlu in cualchi maniere: no rivi a pensâ a nuie altri.

La nestre tiere e je une mari avare cun cui che al à la fortune di vêle par fâi fâ cualchi frut.

Chei altris a son vuarfins e nissun al pense a lôr.

Une dì a passin doi oms che a fevelin di altris tieris, là di là dal mâr, indulà che lis robis a son miôr e la vite e je possibile. Par rivâ là bisugne paiâ e lôr a pensin a dut.

Tancj inte vile a vuelin partî.

La cifre e je alte: intes fameis dome un al pues là, se si à alc di vendi e se si cjate cualchidun che ur al compri.

Inte mê famee no pues fevelâ cun nissun; nissun mi judarès o podarès judâmi a cjapâ une decision.

Ma jo o brusi di desideri di partî e, une dì, tornâ finalmentri felice, par fâ felicis.

Une matine intal cricâ dal dì, crût e plen di aiar, i oms a vegnin a cjoli cui che al à decidût di partî.

A vuelin ducj i beçs, prime.

A son spreçants e a tratin cun tante arogance e fûr di mût.

A mi viodin.

Un al ven dongje, mi cjale fis, cuntun mût che mi spauris e che no ai mai viodût prime. "Tu, vuelistu vignî? Anìn".

di Annamaria Gon

#11